

SAN PABLO KARTA GALAKIA KIWESUWE'SX JÏI

Galacia kiwesuwe'sxtxi weçxana fxi'jni

1 ¹Adxa' Jesukristo jxkaahnisa Pablo yaaseth. Naa kiwete piçthê'jwe'sx adxa's txhitxhçxa jxkaahnisameeth, wejxwa Jesukristo vxite' Dxus kwe'sx Tata na'wê uunijüwa ki' itxi vxitku txäawe'sx jxkaahnisath. ²Adx vxite' yakthê'jwe'sx ayte üssa txäawe'sx yakh naa karta's fxi'jçxa kajaçthu Kristo nasa Galacia kiwesu pkhaakhena üssawe'sxtxi weçxana. ³I'kwe'sxtxi' Dxusa' pu'çxhina ewçxáa kaafxi'ze'jna vxite' kwe'sxtxi jxpe'jsa Jesukristo. ⁴Txäa Jesukristo ík kwe'sx pkaltxi khühkhçxa ewmeejü nwe'weya' peekíi ya'dukhçxa kwe'sx pa'gate uu, Dxus jxthäasniçxá's kxtey yuuna. ⁵Txäa pa'ga Dxusa's багаçxtewa wala weçxawa'j ji'ptha'w.

Dxus yuwe vxite yu' meea'

⁶I'kwe'sxa' Kristo nwe'wenijü txaçxmeyna txuteeçxa Dxus yuwe vxite fxiy kaapiya'jniçxá's nwêese'jna üsta' jïni's jiyuçxa', adxa' wala kuh yaaki'th. ⁷Ewte nvxiitwa'jsa Dxus yuwe vxite yu' meea', nawa i'kwe'sxtxi kaypuba'j wêeçxaçxáa maafi' yu' Kristo kaapiya'jni's yu'pthehçxa fxiy kaapiya'jna üsta'. ⁸Nawa kwe'sx pta'sxtha'w txä'wémée fxiy kaapiya'jna pa'jatxna Dxus yuwe' jïna aç'a' txä'wê yüusatxi' Dxus yuu iiméh seena' ewmeesata' jïçxa ivxiituwa'the nvxiitni yuutxna. Meeçxa' adx ma'th fxiy kaapiya'jna pa'j meeçxa' cielujü kiisa angel ma'k txä'wê fxiy kaapiya'jna pa'j nawa txä'wê yüusa yuutxi' txä'wêçxaçxáa yuuni yuutxna. ⁹Na'jï'th na': Maawa Dxus yuwe's pta'sxsatha'w jïçxawa fxiy pta'sxna pa'jatxna kwe'sx kaapiya'tha'w txä'wémée aç'a' txäa nasatxi' Dxus yuu iiméh seena' ewmeesata' jïçxa ivxiituwa'theçxáa nvxiitni yuutxna.

¹⁰Na'wêth we'we' aç'a' i'kwe'sxa' peekx mjiyuwe: adxa' naa kiwete piçthê'jwe'sx adxa's ew we'we jxthäasna üsmeeth, naasáa Dxus

kaaüusuthe'jniçxá'sthu äate we'we'. Sa' naa kiwete piçthê'jwe'sxtxi weçxaa jxthâasna üsçxa', Kristona selpiisameeçxa txã'wê yu'nja.

Judiu jil'mée vxite nasatx Dxus yuwe's pta'sxsa Pablo

¹¹Yakthê'jwe'sx mjiyuwe: Na'wê Dxus yuwe ewte nvxiitwa'jsa's pta'sxi'th txã' piçthê'jwe'sx üus yajkxçxa kaapiya'jnisame'. ¹²Txã'sa' adxa's naa kiwete piçthê'jwe'sx üsmeeta', naasáa Jesukristo yuuçxáak kaajiyu'j.

¹³I'kwe'sxa' jiiyã'jne'kwe adxa' nyafxí' judiuwe'sx jxkaahni's nwêese'jna üsçxa', ma'wêtká fxi'ze', sa' ma'wêtká seena' juuna' yuuna Kristo nasatx ahçe ivxiituya' sühçxa. ¹⁴Adxa' judiuwe'sx jxkaahni leya's kihte yuhwa peejxmée jxukath kxtey yuuna üssa yu', adx ja'dawe'sx üsu'tx txãawe'sxte jxthaakwe. Sa' adx yaçgawe'sx kaapiya'jni's adxçxáath iiméh ew kxtey yuusa yu'. ¹⁵Txã'wê açasatewa, Dxusa' adxa's iiméh wala peeygähçxa, mama tutxhuh kasehmeyna txhitxhçxa nvxiitnisa ne'tka yu'. ¹⁶Txãasak txajx Nçxi'ka's jiyuwa'j en ähte', adxa's pa'yaçxa kaajiyu'j txã'wê txajx yuwe ewte nvxiitwa'jsa's judiu jil'mée vxite nasatx pta'sxkahn. Aça' adxa' maa yuhtxwa paapëjxya' u'lmeeth. ¹⁷Jerusalente Jesukristo jxkaahnisawe'sx üsu'tx txãawe'sxçxáa yuhtxwa thegya' u'lmeeth. Txã'wê yüupkaçxte wejxwa Arabia kiwenthu u'j, sa' txãa e'su sxawedçxa' Damaskonthu u'j.

¹⁸Sa' tekx anxu skhêwnijüth Jerusalenna u'j, txãasath Pedro's jiyu, sa' kxtee üsu'th txãa yakh e'z ki'su ähpkaçx. ¹⁹Nawa Jesukristo jxkaahnisawe'sx vxite yu' jwee yu' uymeeth, naasáa Jesukristo nyakh Jakoboçxá'sthu uy. ²⁰Dxus dxi'pte isath we'we', na'wê kim yuhtxwa paapëjxmeeth jïna fxi'jaçthü txã' isxiinisame'.

²¹Txãa e'su' Siria vxite' Cilicia kiwenthu u'j. ²²Aça' Kristo nasa Judea kiwesu üsta' txãawe'sxa' adx yu'sa' iiuymeeta', ²³naasáa na'jiniçxá'stxi wêse'j: Kwe'sxtxi ahçeçxa ivxiitu wêesaçxawa, açxha' Kristo's jxpa'gawa'ja's pta'sxna u'ju' jïni'stxi wêse'j. ²⁴Txã'wê wêse'jçxa', Dxusa's wala weçxatx adx txã'wê yüupa'ga.

2 ¹Katorce anxu skhêwnijü' ki' u'th Jerusalenna, Bernabé vxite' Tito txãawe'sxtxi pe'jçxa. ²Txã'wê u'jwa'ja's Dxusku pta'sx txãa pa'gath adxa' u'j. Sa' kxtee Jerusalente jxkaahsawe'sxta' jïni üsu'tx txãawe'sx yakh dudte pkhaakheçxa txãawe'sxtxi pta'sxthu na'wê judiu jil'mée vxite nasatx kaapiya'ja'th Dxus yuwe ewte nvxiitwa'jsa's txã'sna. Txã'wêth pta'sx, txã'wême' adx mjïni' ewmeek yu' jïwe'sxte. ³Nawa Tito adx yakh kxtee üsu'k txã'sçxáa yuhnawa kaacirkuncidaï'jmeeta', txã' judiu meek yu' na'swa. ⁴Txã'wêtewa txãa entey kwe'sx ksxavxyte u'katx kwe'sxwa yakthê'jwe'sxtha'w jïna isxiisa. Txãawe'sx yu' Tito's kaacirkuncidaï'j wêetx. Kwe'sx txã'wê yüumeçxawa, Kristo Jesus yakh kwe'sx ew fxi'zeni's suw wêeçxatx peethegu'jya' u'ka, judiuwe'sx fxi'zenitey

kaasxwedulj wēeçxa. ⁵Txã'wētewa, weh yuhwa txãawe'sx we'weni's kxtey yuumeetha'w, txã'wē Dxus yuwe isa pta'sxnixçá's i'kwe'sx nwēese'ljna nes yuukahntha'w txãawe'sx we'weni's kxtey yuumée.

⁶Kwe'sx txã'wē nwēese'ljmeetewa, yakthē'ljwe'sx jxkaahsawe'sxa' adxa's kaapiya'ljwa'lj fxiy yu' kīh yuhwa yu'kxpehmeeta'. Makwe txãawe'sxa' walasa ne'ta yu', nawa adxa' txãatxi' thegu ji'phmeeth, txãa pa'gatey Dxus dxi'pte' maa yuhwa walasamée teeçxa na'wēçxaçxáatha'w naa pa'ga. ⁷Txã'wē kaapiya'ljwa'lja's fxiy yu'kxpehna pta'sxipkaçxte, wejxwa txãawe'sxa' jiyutx Dxus yuh idxa's kaahne', txajx yuwe ewsa's judiu ji'jmée vxite nasatxwa pta'sxkahn. Pedronawa ma'wēga judiu ji'ljçxáatx pta'sxwa'lja nvxih, txã'wēy ne' idxa's vxite nasatx pta'sxwa'lja nvxih jīnaçxáatx we'we. ⁸Txãa pa'gatey judiwe'sxçxáatx pta'sxwa'lja Pedrona kaahsa Dxus iñçxáak adxnawa kaah judiu ji'jmée vxite nasaa ksxavxsu.

⁹Txajíçxáatx Jakobo, Pedro vxite' Juan txãawe'sxa' walasata' jīnisaçxawa, kwe'sxtxi'sa' ma'ljmée Dxus ne' txã'wē i'kwe'sxtxi's mjīiwa'lja nvxih jīçxa weçxana kuse ūstxi adxna vxite' Bernabewe'sxtxi na'ljīna: I'kwe'sxa' judiu ji'jmée vxite nasa yakh mjīine'kwe, naapkaçxha' kwe'sxa' judiu ji'lj yakhçxáa mjī'nja'w jīçxatx txã'wē kuse ūs. ¹⁰Naasáa yakthē'ljwe'sx kīhwa ji'phmée peejiina fxi'zesa yuutxi' pu'çxwa'lja's peçxkanamée yajkxna fxi'zene'kwe jīnaçxáatx neewe'we, aça' txã'sa' wala jxpa'yakx kxtey yu'th.

Ewte neeyūuya' judiwe'sxwa Kristo's ūuste jxpa'gawa'lja'

¹¹Txã'wē Pedro' walasa' jīnisatewa, adxa' txã'sa' wala juuna' we'weth, Antiokíate pa'ljçxa' ewmeek yūuna ūsu' naa pa'ga. ¹²Pedro' Antiokíate ūsçxa', Jerusalenu Jakobo kaahnisawe'sx pa'ljmeyna yu' judiu ji'jmée vxite nasa yakh pkhaakheçxa txãawe'sx yakh wa'lmeek ū'we'. Nawa Jerusalenuwe'sx pa'ljyá'the', txuteeçxa pkhaakheme', txajx ji'lj cirkuncidāynisawe'sxtxi ūukhçxak txã'wē yūu. ¹³Aça' judiu ji'lj Dxusna jiisa ūsu'tx txãawe'sxwa Pedro na'wēytxi yūu. Txãa pa'ga Bernabé yuhwa Pedrowe'sx yakhku utxáa. ¹⁴Dxus yuwe ewte nvxiitwa'lja' txã'wē jxkaaja'çme' na's txã'wē fxiy yuuçte', adxa' Pedro's wala juuna' we'weth pkhaakhesawe'sx ksxavxyte na'ljīna: Idxa' judiuçxawa, ayte ūsçxa' vxite pa'ljmeyna yu' judiu na'wēmeeg fxi'ze. Nawa açxh vxite pa'the yu', çkījxa'ga judiu ji'jmée vxite nasa yakha' utxaawa'ljme' jīsa na'wē yu'?

¹⁵Kwe'sxa' mama tutxhuh kasejīi judiu ji'tha'w yu', sa' Dxusna jiimeesa ji'lj yu'çmeetha'w. ¹⁶Makwe judiu ji'ljçxawa, Moises leya'sçxáa yajkxte', maa yuhwa yuuwemée ewsa ya'yu'çme', naasáa Jesukristo's ūuste jxpa'gate yuuçxáak yuuwemeesa ewte ya'neeyū'. Txajíçxáatha'w kwe'sxa' judiuçxawa, yuuwemée ewte neeyūuya' sūhçxa Jesukristo's ūusuh jxuka yajkxçxa jxpa'ga, txã'wē ley jxkaahni yakha' yuuwemée

ewte ya'neeyū'çme' naa pa'ga. Aça' leya's yaakxsa' naa kiwete kim yuhwa yuuwemée ewte neeyūuwa'jsameeta'.

¹⁷Txāasa ew yajkxte yu', makwe judiuçxawa yuuwemeesa yuuya' Kristo's ūuste jxpa'gameeçxa yu', pkalsafiçxāa ne'tka'w. Txā'jīte', leya's nvxihtçxa Kristoçxá's jxpa'gaçxa ne'tka'w yuuwe pkalsa yuu sūjuwá'kwe. Weh yuhwa txā'wēme'. ¹⁸Moises leya's nwēese'jmeete ewna jīçxawa, e'su ki' we'weçxa': Pejka nwēese'the ewna jīna we'wesa txā'wē yuuwesa yuuna. ¹⁹Adxa' Moises leya's nvxihtçxawa ki' nwēese'jçxa' yuuwesa yuuya'mée txāa ley yakha' uúsāa na'wēth yuu, Dxusçxāana nwēese'jya'. ²⁰Adxa' leya's nwēese'jya'mée Dxus yakhçxāa fxi'zeyá', Kristo yakh ja'da uúsāa na'wēth yuu, Txāasa āçxh ītxi fxi'ze'th txā' adx jīime', adxna ītxi kaafxī'ze'jsa Kristo jī'. Txāasath naa kakwe yakh ītxi fxi'ze'ççxawa, na'wē Dxus Nçxi'k adxna peeygāhçxa peekíi ya'dukhçxa uuk adx pa'gate txāa yakh yuuçxāa fxi'ze'. ²¹Txāa pa'ga Dxus peeygāhçxa ewte nvxiitni's weeçx wēemeeth. Txā'wē leya's nwēese'pha'gaçxāa yuuwemée ewte neeyūuwaça', Kristo uuni' kxulne' yuuwa'j yu'. Nawa txā'wē yuume'.

Leypa'ga Dxus Espiritu's ya'jyapa'ga'çme'

3 ¹Galacia kiwesuwe'sx, wala yuh jīimeesa yuui'kwe. I'kwe'sxtxi' çkinga txakwe wala īsxii açkwe Dxus yuwe isasa's nvxiht? I'kwe'sx txā'wē yuukahmeníi tha'w kwe'sxa' āate pta'sx Jesukristo kluuskhē uúsāa kimtewa. ²Mpeeta'sxwe: I'kwe'sxa' çMoises ley jxkaahni's nwēese'jçxakwe Dxus Espiritu's jxpa'ga'? Meeçxa' çkwe'sx pta'sxni's nwēese'jçxakwe Dxus Espiritu's jxpa'ga'? ³I'kwe'sxa' pejka txakwe yu' wala jxpubawa'jmeetena Dxus Espiritu i'kwe'sx ūuste pu'çxya' takhni's çma'wē i'kwe'sx kakweju pa'pçxuçxa Dxus Espiritu takhni's jxā'jaki'kwe? ⁴Dxus yuwe's wēse'pha'ga nakwe wala pkxuuni yuui'kwe nawa Dxus yuwe isa pta'sxni's nvxihtçxa', kxulteçxāa pkxuunisa yuune'kwe. Txakwe kxulteçxāa yu' pkxuuni yuumeewaç wejx ewna. ⁵Dxusa' txajx Espiritu's ūsçxa', kim yuhwa ājanimeesa's kījkīhwa kaavxya'ja'ja'k i'kwe'sxtxi ew jiyukahn pu'çxna sa' çley jxkaahni's kxtey yuupa'gaga txā'wē yuuá'? Meeçxa' çkwe'sx pta'sxni' isasa yuhna sūhna jxpa'gate wá' txā'wē yuu?

Abrahan yakh Dxus puutx we'weni

⁶Abrahana's miiyajxwe: Txā' ūusuh yuuçxāak Dxusa's jxuka yajkxna nwēese'j. Aça' txā'wē yūuteçxāa Dxusa' Abrahana's yuuwemée ewsak vxit. ⁷Txāa pa'ga i'kwe'sxa' mjyiuwe: Dxusa's ūusuh yuuçxāa jxuka yajkxna nwēese'jsa yuuçxāa Abrahan jī'j yuutxna. ⁸Txā'wē judiu jī'jmée vxite nasawa Dxusa's ūusuh jxuka yajkxna nwēese'theçxāa txāawe'sxtxiwa yuuwemée ewsa vxitwa'ja's dxiikhēy pta'sxnik yuu Abrahana's na'jīna: Maa nasawa jxuka ewsa yuutxna iidxpa'ga yuuçxāa jī'k Dxus librute. ⁹Txāa pa'ga maawa Dxusa's ūusuh yuuçxāa yajkçxa nwēese'jsa' Abrahan na'wēy yuuwemée ewsata' āçxwe'sxwa.

¹⁰ Aça' Moises ley jxkaaja'k txã'sçxáana kxtey yuusa': Iiméh seena' ewmeesata' jina Dxus yuu we'weçxa', ivxiituwa'the nvxiitni ũsta'. Txajíik Moises ley íiwa na'wē we'we': Maawa ley jxkaahnix jxuka kxtey yuusame!, ivxiituwa'the nvxiitni yuutxna jī'k. ¹¹ Aça' txã'wē leya'sçxáa nwēese'jsa' kim yuhwa Dxus dxi'pte yuuwemée ewsa yu' meeta'. Txajíik áate na'wē pta'sxi' Dxus librute': Dxusa's ũsuh jxuka yajkxteçxáa Dxus dxi'pte yuuwemeesa yuua'ja's ya'ji'phuna jī'k. ¹² Aça' Moises leya' Dxusa's ũsuh yaakxwa'ja's we'we'çme'. Txã'wē ũsuh yaakxwa'ja's we'wemeçxa íik na'wēçxáa we'we': Maawa jxkaahna fxi'jçxa nvxiitnisaçxáatx jxuka kxtey nwēese'jwa'ja' itxi fxi'zeyá' jī'k.

¹³ Txã'wē leya's jxukamée nwēese'pha'ga iiméh seena' yuuwesatha'w yu', txãa pa'ga Kristok kwe'sx iiméh seena' yuuwesa pa'gate uu, ley kastigäyni kwe'sxtxi nwe'weya'. Txã'wē iiméh seena' yuuwesa's kastigäyni uuwa'ja's na'wēk pta'sxi' Dxus librute: Iiméh seena' yuuwesa's maawa fxtüukhē a'kxçxa ikhni yuuna jī'k. ¹⁴ Txã'wē Kristo Jesus kwe'sx pa'gate uupa'gatha'w judiu jī'jmeeçxawa Dxusa's ũsuh jxuka yajkxna nwēese'pha'ga yuuwemée ewsa yuuçxa Dxus Espiritu's jxpa'gawa'jsa yuu. Txã'wē yuua'ja'sku Dxusa' Abrahan yakh puutx we'we txã' kxtey yuuk.

¹⁵ Yakthē'jwe'sx, na'wē yūuni's miiyajxwe: Kwe'sxa' kīh yūuya' puutx we'weçxawa txã'sa' peçxkanamée kxtey yuuya' jxuka eçte fxi'jçxa peekx yase's ki'pçxak ya'nvxiitu'. Aça' txã'wē yūuni's kim yuhwa ísxiini' jīya' ája'çmeeta', sa' yu'pthejxa'wa ája'çmeeta'. ¹⁶ Txã'wēy Dxuswa Abrahan yakh ew puutx we'weçxa nvxiitni's kim yuhwa yu'pthejxa' ájameetxna vxite' Abrahan jī'j yakh puutx we'weni's. (Dxus we'weçxa': Iidx jī'jwe'sx jī'çme', naasáa teeçxçxáak kxsusu': Iidx jī'j jīnaçxáa. Txãa yu' Kristo's we'weçxak txã'jī'.) ¹⁷ Na'jī'th na': Dxusa' ũswa'ja's kxtey yuuya' Abrahan yakh ewku puutx we'weçxa neeyūu, aça' txãa puutx we'weni kuartocientos treinta anxu skhēwnijūk Moises leya' kasehna ũsu'. Naa pa'ga txãa leya' Dxus ew puutx we'weçxa nvxiitni's yu'pthejxa' ájawa'jsame!, e'su kasehsa' naa pa'ga. ¹⁸ Moises leypa'ga ewte neeyūuwa'ja's jxpa'gawa'jsawaça', dxiikhēy Dxus puutx we'weni' selpiwa'jmée ne' yu'. Nawa txã'wē yūumée, ewte neeyūuwa'ja's Dxusa' Abrahan yakh ew puutx we'weçxa neeyūuk txã' Moises leypa'gaméek jxpa'gawa'j yu'.

Leya' na'wēçxáa yuusa'

¹⁹ Txã'wēte!, Moises leya' çkīhtega selpi'? Ewmée yūuna fxi'zepa'ga yu'kxpehna fxi'jçxa nvxiitnisaçxáak yu'. Sa' Dxus Abrahan yakh puutx we'weçxa': Iidx jī'j jīk txãa pa'phkaçxçxáak txãa leya' jxkaahwa'jsa yu'. Txãa leya's fxi'jçxa nvxiit-sa yu' Dxus angeleswe'sxçxáatx yu', aça' Moisesku jxpa'gaçxa jweeju yu' nasatx kaapiya'j. ²⁰ Nawa ewte neeyūuwa'ja's Dxus puutx we'wek txã'sa' angeleswe'sx jxpa'gaçxa peena

Abrahana's ūsmeeta'. Txā'wē yūumée, Dxus yuuk txajx yuweju ewte neeyūuwa'ja's puutx we'we.

²¹ Txā'jite', Moises ley yakh Dxus puutx we'wenisa yakha' utxaaya' ājawa'jsamée iipuiisatxna sūjuwá'kwe. Txā'wēsameeta'. Aça' ley txā'wē ewte neeyūuwa'ja's ūsya' ājawa'jsawaça', leya's nwēese'jsa yu' jxuka ewte yā'j ūs yu'nja'w. ²² Nawa txā'wēmeete íik leyíi we'weçxawa: Jxukaysa pkalte yuuçxáa ūsta' jì'. Txāa pa'ga Jesukristo's ūsuh jxuka yajkçxa yuuçxáa kwe'sx ewte neeyūuwa'ja's Dxus puutx we'wek txā'sa' jxpa'gawa'jsatha'w.

²³ Txā'jite', Moises leya' Dxus puutx we'weni's acesana sūjuwá'kwe. Weh yuhwa acesame'. Wejx yuuwa leya' kwe'sxtxi jxaawna ūssak yu' Jesukristo's ūste jxpa'gaçxa ewte neeyūukahn. ²⁴ Leya' naasáa Kristo kīhpkaçx kwe'sxtxi jxpe'jsaçxáak yu', kxah Kristo kīhte', txā'sa' ūste jxpa'gaçxa' yuuwemée ewte neeyūuwa'ja's jì'phukahn. ²⁵ Āçxha' Kristo's ūste jxpa'gawa'j en ājk, aça' txāa ley kwe'sxtxi jxpe'jsa's peena yu' yaakxwa'j jì'phmeetha'w.

²⁶ Txāa pa'ga i'kwe'sxa' Kristo's ūsuh jxuka yajkçxa nwēese'pha'gaçxáa Dxus luuçx yuui'kwe. ²⁷ I'kwe'sx jxukaysa Kristo yakh fxi'zeyā' sūhçxa yu'te ya'bautisāysa' txajx kusete jxpe'jni ūsi'kwe. ²⁸ Āçxha' maa yuhwa puutx iíwejçx yaakxwa'jme'. Judiu ma'k yuu meeçxa' judiumée ma'k yuu, patron jì'phsa ma'k yuu meeçxa' patron jì'phmeesa ma'k yuu, piçthē'j ma'k yuu meeçxa' u'y ma'k yuu nawa maa yuhwa puutx iíwejçx yaakxwa'jme', txāa pa'gatey Kristo Jesus yakh fxi'zesa' maa yuhwa thaakwemée jxukaysa puutx txāa na'wēçxaçxáa i'kwe. ²⁹ I'kwe'sxa' Kristo's jxpa'gasaçxa', Abrahan jì'jçxa txā'wē yuune'kwe, sa' ewte neeyūuwa'ja's puutx we'wek txā'sa' jxpa'gawa'jsai'kwe.

4 ¹ Āçxha' na'sna mjiyuwe: Luuçxa' ney uute', le'çxkuēy yu' vxite thē'jsa kusetek jxpe'jni fxi'ze' walaaçxa yu', ney nvxiitni's jxuka txāaçaçxáa jxpa'gawa'jsaçxawa. ² Aça' le'çxkuēy yu' thē'jsatx thegna jxpe'je', makwe txaçxpkaçx ne' neya' neewe'weçxa thē'jsa kusete jxpe'khan nvxiht txāa en āhpkaçx. ³ Kwe'sxwa txā'wēysatha'w yu'. Luuçxwa ma'wēga le'çxkuēy yu' thē'jsa jxpe'jni fxi'ze', txā'wēytha'w nyafxíi yu' ley jxkaahni txajx kusete fxi'zena ūsu!. ⁴ Nawa makwe txaçxpkaçx ne'tka'w jxpe'jni fxi'zewa'jsa yu' txāa en pçuute', Dxusa' txajx Nçxi'ka's kaakh, teeçx u'y kakwete kasehçxa judiuwe'sx na'wēy leya's nwēese'jwa'jsa. ⁵ Aça' kwe'sxa' ley jxpe'jni ūstewa, txā'wē yūuçxak txāajū kutxi'jçxa Dxus luuçx yuua'ja's ūs. ⁶ Txāa pa'ga i'kwe Dxus luuçx yuuna pa'j, aça' Dxusa' txajx Espiritu's i'kwe'sx ūste kaakh, āçxha' Dxus luuçxtha'w sūhwa'ja's jì'phukahn. Txajk Dxus Espiritu' i'kwe'sx ūste kaaūsuthe'je' Dxusa' kwe'sx Tata' sūhwa'ja's. ⁷ Txāa pa'ga āçxha' i'kwe'sxa' ley jxpe'jnisamée, Dxus luuçxi'kwe. Aça' txajx luuçx yuupa'ga

Dxusa' txāa jī's kīhnawa jxuka i'kwe'sx jīçxaçxāa nvxiituna Kristo nwe'wepa'ga.

Ley jxkaahnite ki' sxawedsatx yu'kxpehni

⁸I'kwe'sxa' nyafxíi yu' Dxusa's jiimeeçxa', Dxusmeeçxáatx i'kwe selpiina fxi'zesa yu'. ⁹Nawa açxha' Dxusa's jiisa yā'ji'kwe meeçxawa Dxusa' i'kwe'sxtxi jiia' aça' çkijxa'çxāa ki' sxaweduki'kwe piçthē'jwe'sx kaapiya'jni açxamée seelpisate fxi'zeya'? ¹⁰Txā'wē Dxusa's jiiyā'jçxa', ley jxkaahni entxi ki'sna, a'tetxwa ki'sna, anxutxwa ki'sna nwēese'jwa'l'j jī'phmeei'kwe. ¹¹Txāa pa'gath txā'wē yūuçte uyçxa wala yaaki': Kxulçxāa wá'ntka i'kwe'sxtxi kaapiya'j sūhna.

¹²Txāasath yakthē'jwe'sxtxi neewe'we', adxwa ma'wētka ley kaapiya'jni's jxuka nvxihtçxa i'kwe'sx na'wēy ley jxkaahnimée fxi'zena ūsu' txā'wēy yuukahn. ¹³Txā'wē adxa' kxtee uuya' ūçxa', i'kwe'sxtxi nyafxçxah Dxus yuwe's pta'sxte', ¹⁴aça'na ūstewa ahçemée wejxwa Dxus angel meeçxawa Jesukristo thasi'kwe weçxana jxpa'ga adxa's. ¹⁵Nawa txagaçxtey wēt weçxana yaakxnisa' çmteega yuu? Na'jī'th na': Txagaçxhíi yu' adxna peeygāaweeteçxāa i'kwe'sx yafxtxi kutxi'jçxa adxna ūsya' ājawaça', txā'wē yūuwa'jne'kwe yu'. ¹⁶Nawa açxha' isasa's pta'sxsa yu's açesa na'wē yuuna ūsi'kwe adxa's.

¹⁷Kxsū i'kwe'sxtxi kaapiya'jsawe'sxa' i'kwe'sxtxi txāawe'sx ju'gutx tuphi jxthāasu'. Nawa ew yajkxçxa txā'wē yu'çmeeta', naasāa adx kaapiya'jni'jū txude wēeçxaçxāa txā'wē yūuna ūsta', i'kwe'sxa' txāawe'sx yakh u'khan. ¹⁸Txā'wē vxitesatx peekx ju'gu tuphywa'l'j yuja', nawa bagaçxtewa ew yūuwa'jçxā's yajkxçxa txā'wē yūuwa'ja', sa' adx kxtee i'kwe'sx yakh ih ūsteçxāa txā'wē ew yūusāa na'wē fxi'zewa'jme'. ¹⁹Luuçxwe'sx, adxa' i'kwe'sx txā'wē yūupa'ga iiméh wala akate nxusna ūsthu, u'y nasate yaakasāa na'wē. Sa' nxusna nes yu'nja i'kwe'sxa' Kristo na'wēy fxi'zeya' ājapkaçx. ²⁰Adxa' açxhíith kxtee i'kwe'sx yakh ūs wēje', i'kwe'sx jxpubana yaakxni's yu'pthejxa'. Nawa jiimeeth i'kwe'sxtxi ma'wē pu'çxwa'ja'swa.

Sara Agar yakh kaaja'da'jni

²¹I'kwe'sxa' ewte neeyūuya' sūhçxa' Moises leya's i'kwe yaaki', sa' txāa leya' na'wēsaçxā' txā'sa' jiyu'çmeewá'kwe. ²²Txā'sa' jiyukahn na'wē fxi'jni ūsa' Dxus librate: Abrahana' e'z luuçxku jī'phu jī'k. Teeçxsa' peekx nyuutewe'sxmée, yatte selpisāa u'ytewe'sxku yu', aça' vxite nçxi'ka' peekx nyuutewe'sxku yu'. ²³Aça' yatte selpisaate kasehsa' kīhwa meesa peekx vxyaasaçxāak yu'. Nawa peekx nyuute kasehsa' na'wē Dxusa' Abrahan yakh puutx we'weçxa': Luuçx jī'phune'kwe jīk txāak yu'. ²⁴Txāa e'z u'ya' na'wēsata: Na'wē Dxus e'zsa yakh puutx we'wek Abrahan vxite' Moises yakh txāata' txāa e'z u'ysa'. Dxus puutx we'weni teeçxsa' Sinaí

vxiç walatek yuu, açá' kxtee puutx we'weni' Agarwa ma'wēga vxitee jxkaahni selpiina fxi'ze txā'wēsa'. Txāasa ítx txāa puutx we'wenijū upxsa' ley jxkaahnitx selpiina fxi'zeya' kaseje'. ²⁵Agara' Arabia kiwesu Sinaí vxiç wala na'wēsa'; txā'wēy naa ensu Jerusalen ūsa' txāawa txāa Sinaí na'wēysa'. Txajíçxáa txāa çxhabte ūssa judiuwe'sxa' vxitee kusete jxkaahnisawe'sxta'. ²⁶Naapkaçxha' cielute Jerusalen çxhabtewe'sxa' vxitee jxkaahni fxi'zesameeta'. Kwe'sxa' kxteewe'sxtha'w thaakwesa. ²⁷Txā'sna we'weçxak Dxus librute na'jì':

U'y nasa ji'phuwa'jmeesaçxawa, nxusmée wēt miijajkxwe.

Weçxana sus mwe'wewe, nasate yaakani's jiimeeçxawa.

Txāa pa'gatey luuçx ji'phuwa'jmeesaçxawa,

Luuçx ji'phuwa'jsate jxthaakwe luuçx ji'phuna jì'k.

²⁸Yakhthē'jwe'sx, kwe'sxa' Dxus puutx we'weçxa': Luuçx ji'phune'kwe jìk txāatewe'sxtha'w Isaak na'wēsa. ²⁹Txāa entewa ma'wēga selpiina fxi'zesa luuçxa' Dxus puutx we'wenite kasehsa luuçxa's ahçena kiite, açxhwa txā'wēyçxáa yūuna ūsta'. ³⁰Txāa ente txā'wē açepa'gak na'wē yūuni's Dxus librute pta'sxi': Txāa u'y selpisa's pçxi'k ítx mkuutxi'j. Txā'wēme' selpisáa nçxi'ka' peekx nyuute nçxi'k yakh ja'daçxah jxpa'gaya' ajameena ney nvxiitni's jì'k. ³¹Nawa kwe'sxa' selpisáa nçxi'k na'wēsameetha'w, wejxwa nyuute nçxi'k na'wēsatha'w.

Ley jxkaahnimée fxi'zeni

5 ¹Kristo' ley jxkaahnijū txuhdek, kwe'sxa' ley jxkaahni fxi'zekahmen. Açá' i'kwe'sxa' ewte pa'jyā'jçxa', peena yu' utxaanuwe ley jxkaahni's nwēese'jya'.

²Ew mjiyuwe: Adxa' na'jì'th na', i'kwe'sxa' cirkunciona's jxpa'gawá'kwe açá' ley jxkaahnijū Kristo nwe'wek txā' kxul yuuna.

³Ki' kaayaki'jìçthu: Maa piçthē'jwa ya'cirkuncidāy yā'jçxa', txā'sçxáana jxpa'gamée, Moises leya's jxuka nwēese'jwa'j jì'phta'. ⁴Leya's jxuka kxtey nwēese'jçxa yuuçxáa yuuwemée ewte neeyū'nja sūhna yaakxsa',

Kristo tasxu txutesáa yuune'kwe, sa' Dxus peeygāanijūwa txutesáa yuune'kwe. ⁵Nawa kwe'sxa' Kristo's ūsuh yuuçxáa jxuka yaakxwa'ja's Dxus Espiritu pu'çxte', txā'wē yūuçxaçxáa yuuwemée ewsatha'w yuu.

⁶Txāa pa'gatey Kristo Jesus yakh fxi'zesa yakha' cirkuncidāyini ma'k yuu cirkuncidāynimée ma'k yuu nawa txā'wēsa' peejxme', naasáa Kristo's ūuste jxpa'ganiçxáa txā'wē', txāa pa'gatey Kristo's ūuste jxpa'ganijū' peeygāawa'ja's ya'jì'phu'k naa pa'ga.

⁷I'kwe'sxa' ew yā'jì'kwe fxi'zena ūs yu', açá' çkimga nwēese'khamen kaypuba'jna pa'j? ⁸I'kwe'sxtxi kaypuba'jna pa'jsa' Dxus kaahnisa yu'çmeeta'. ⁹Txāa pa'ga mpa'yajkxwe. Txā'wēme', lewadura' le'çxkuēeçxawa jxukak pēetheje' skuutxh ū'we makwetewa.

¹⁰Txā'wētewa i'kwe'sxa' txakwe yu' jxpubakahmen Kristo' pejka

pu'çxhina sūju'th. Nawa Dxusa' seena' yuh kastigaîna kaypuba'jsa's kintewa.

¹¹Yakthê'jwe'sx, miijajkxwe: Adxa' txâ'wê cirkuncidâywa'ja's kaapiya'jwaça', judiuwe'sxa' adxa's ahçemeetxna. Txâ'wê yuuwaç yu', Kristo' nwe'weya' kluskhê uuk jîna pta'sxnisa' kaaüusçxa'ljmeena judiuwe'sxtxi'. ¹²Nawa txâ'wê i'kwe'sxtxi kaacirkuncidaî'j wêena kuçx yuuna fxi'zesa' peekx kakwetewe'sxa's tee jwed jxuka ya'spê'thwaça', jiyutxna sūju'th adxa'.

¹³I'kwe'sxtxi' cirkuncidâykahmenî ley jxkaahnijû nwe'wenisa yâ'ji'kwe yuu. Nawa txâ'jite', açxha' leya' we'wewa'j ji'phmeena sühçxa peekx ma'wêwa ewmée yūuna fxi'zewa'jme', wejxwa vxitetx peeygâhna puutx ya'selpiina fxi'zewa'ja'. ¹⁴Txâa pa'gatey leya' txâ'wê yūuwa'ja'siîçxâak wejx thaakwe neewe'we' na'jîna: Peekîi ma'wêga ya'peeygâja', txâ'wêy mpeeygâh maatxwa jî'k. ¹⁵Nawa txâ'wê yūumée puutx puîina yahçena fxi'zesa' jxuka ja'daçxah puutx pçuune'kwe jxpa'yakxmeeçxa'.

Kwe'sx ūus yaakxni vxite' Dxus Espiritu kaaüusuthe'jni

¹⁶Txâ'wê yūuwe'sxte na'wê yūuwa'ja'sthu pta'sxi': Dxus Espiritu ew kaaüusuthe'jniçxâ's kxtey yuuna mfxi'zewe, peekx ūusuhçxâa yaakxni's kxtey yuuya'mée. ¹⁷Txâ'wême', kwe'sx ūusuhçxâa yaakxnisa' pejka yuh ewmeesa'sku yaaki'. Txâa pa'ga Dxus Espiritu' kwe'sx ūus yaakxni's jxpa'ga'çme', naapkaçxha' kwe'sx ūus yaakxni' Dxus Espiritu's yupu'k. Txâa pa'ga ne'kwe pejka yuh ewmeesaçxâ's kxtey yu'. ¹⁸Nawa Dxus Espiritu i'kwe'sx ūuste jxkaahna ūste', jxpubana ley jxkaahnite fxi'zewa'jsamee'i'kwe.

¹⁹Dxus Espiritu kaaüusuthe'jnimée peekx ūusuhçxâa yaakxnisa' naata': ptamumée pkal yuuni, ptamsaçxawa vxitesa yakh pkal yuuni, ma'wêwa kazx pkal yuuni, ²⁰dxus itximeesatx neewe'weni, dxijxuuni, ahçena fxi'zeni, puîini, ipxâani, ūusçxani, puîiwa'ja's ma'wêwa yūuna pakwení, pkhaakhesa yakthê'jwe'sx puutx puîiçxa txutení, ²¹vxitesa ji'phunitx açeni, nasa ikhni, tūuna fxi'zeni, tūusáa pwe'sx ma'wêwa kazx yuuni, pkal ma'wêsawa ūsta' txâatx kxtey yuuni. Txâ'wê yūusatxi' adxa' áate pta'sxiçthu: Txâawe'sxa' Dxus jxkaahna ūsnite u'kawa'jsameeta'. Txâ'sa' nyafxíiwa pta'sx yâ'th.

²²Åçxha' Dxus Espiritu kaaüusuthe'jni' naata': peeygâani, weçx weçxa fxi'zeni, ūuste ewçxâa yaakxni, ūusçxa yajkxmée fxi'zeni, maatxwa peeygâhna fxi'zeni, vxitesatx pu'çxna fxi'zeni, wa'lmée nwêese'jna fxi'zeni, ²³iiwejçx yajkxmée fxi'zeni, ūuste ewmée ūusutheni's nwêese'jmée fxi'zeni. Txâ'wê ew yâ'j fxi'zesa's leya' thegwa'j ji'phme'. ²⁴Kristo nasa yâ'ja', peekx ūus yaakxni ewmeesa's kxtey yuuna fxi'zewa'j ji'phmeeta'.

²⁵Dxus Espiritu txâ'wê ew fxi'zewa'ja's ūste', txâa yakh yuuçxâa fxi'zewa'j ji'ptha'w nwêese'jna. ²⁶Iiwejçx yajkxna puutx puîina ahçena fxi'zewa'j ji'phmeetha'w.

Puutx pu'çxna fxi'zeni

6 ¹Yakhthê'jwe'sxtxi neewe'we'th: Maa yakhthê'jwa âhmée yūuni's jiyu'çxa', txā'sa' myu'kxpehwe, i'kwe'sxa' Dxus yakh çxhāçxha yāj' fxi'zesai'kwe naa pa'ga. Nawa wala jxpa'yakx weeçx we'wemée myu'kxpehwe. Txā'wēme' i'kwe'sxtxiwa wetewa'j en pa'jawáana. ²Teeçxsa na'wēçxah puutx ya'mpu'çxwe thēyte fxi'zeni's. Txā'wē yūu'çxa Kristo jxkaahni's kxtey yuusáa yuune'kwe.

³Kihtewa jwee yu' thaakwe ewsameeçxa txā'wē iiwejçx yajkxçxa', îsxiisa yuuna. ⁴Txāa pa'ga peekx fxi'zeni's khuē'y yaakxwa'j ji'pha' çma'wēsaki'th? sūhna. Txā'wē peekx fxi'zeni ewtewa jiyu'çxa, wētewēt yaakxwa'ja', nawa vxitesa fxi'zeni's weeçxwa'j ji'phme'. ⁵Teeçxsa na'wēçxah peekx fxi'zeniçxá's wala jxpa'yakxwa'ja'.

⁶Kristo jxkaahni's kxtey yuuna kaapiya'jsa's pu'çxwa'j ji'pha' peekx ji'phuni kīh yakhçxáawa.

⁷I'kwe'sxa' ya'jypubanuwe naa sūhna: Kīhwa yūutewa, Dxusa' txakwe yu' jiyumeena sūhna. Dxusa's kim yuhwa txā'wē yu' yajkxna weeçxmeena. I'kwe'sx kīh yūu'çxawa txā'wēysafiçxáa jxpa'gane'kwe. ⁸Meeçxawa peekx ūus yaakxni ewmeesaçxá's kxtey yuusa', uuwa'ja'sçxáa ji'phuna txā'wē yūupa'ga. Nawa Dxus Espiritu kaaūusuthe'jni's kxtey yuusa' bagaçxte yuhwa pçumée itxi fxi'zewa'ja's ji'phuna. ⁹Txāa pa'ga ew yūuwa'jçxá's wahtxmée kxtey yuuna fxi'zewa'j ji'ptha'w. Txā'wē ew yūuwa'ja's wa'lmée kxtey yuuna ūsçxa', ewsa's jxpa'gawa'j en âhte', jxpa'ga'nja'w. ¹⁰Txāasa ma'wēn entewa vxitetx ew yūunaçxáa fxi'zewa'j ji'ptha'w, sa' Dxus yakh fxi'zesa kwe'sx yakhthê'jwe'sx yuutxi' wejx txā'wē ew yūuwa'j ji'ptha'w.

Peekx kakwetewe'sxa's yajkxmée Kristoçxá's weçxani

¹¹Mthegwe, adx kuseju yuu ew áate fxi'jaçthu, i'kwe'sx jiyukahn. ¹²Kristo kluuste uuni's pta'sxpa'ga yaaçeni fxi'ze wēemeeçxaçxáa, txā'wē i'kwe'sxtxi' kaacirkuncidaī'j wēena ūsta'. ¹³Txāawe'sxa' makwe ya'cirkuncidāyçxawa, ley jxkaahni's jxuka yu' kxtey yu'çmeeta'. Nawa i'kwe'sx yuutxi' cirkuncidāykaja'tx, txā'wē kaacirkuncidaī'tha'w sūhna weeçx weeçx yaakx wēeçxatx txā'wē yu'. ¹⁴Nawa adxa' kīh yuhnawa weeçx weeçx yaakx wēemeeth, naasáa kwe'sxtxi jxpe'jsa Jesukristo kluuste uuni yuūçxáak adx ūuste wētewēt kaaūusuthe'je'. Kristo kluuste uupa'ga adx yakha' naa kakwetewe'sxa' seelpisame'. Txāasa adxa' naa kakwetewe'sxa's nwēeselj wēemeeth, uusáa na'wē. ¹⁵Txāa pa'gategy Kristo Jesus yakh fxi'zesa yakha' cirkuncidāyni ma'k yuu meeçxa' cirkuncidāynimée ma'k yuu nawa txā' kīhwa meesa', naasáa ewmée ūus yaakxni's yu'pthehçxa fxi'zenisaçxáa seelpisa'. ¹⁶Na'wēth jxkaaja' txā'sa' kxtey yuuna fxi'zesa' Dxus peeygāani ew fxi'zewa'ja's jxpa'gatxna Dxus luu'çx jxukaysawe'sx.

¹⁷ Ñçxha' naajũ' peena yu' kimwa kuçx yuuni peejxmeeth. Kuçx yuukahmeníi adxa' Jesusa's selpisaath, txãa pa'ga pkxuuni kakwete snxal ji'pthu.

¹⁸ Yakhthẽ'jwe'sx, kwe'sxtxi jxpe'jsa Jesukristo' i'kwe'sx jxukaysatx pu'vxitumée pu'çxhina.